

四庫全書

子部

欽定四庫全書

太平御覽卷四十九

宋 李昉等 撰

地部十四

西楚南越諸山

景山

荆山

荆門山

勾將山

虎牙山

孤山

高筐山

恨山

宜陽山

丹山

小酉山

芋山

嵩梁山

崇山

武山

壺頭山

天門山

黃聞山

風門山

石帆山

虎齒山

移山

淳于山

武陵山

平都山

陽岐山

高都山

原關

君山

小廬山

靜福山

方臺山

攸縣雲陽山

烏龍白騎山

文斤山

石燕山

萬歲山

黃箱山

麓山

昭山

五溪山

錢石山

米玉山

玉山

臨賀山

馬嶺山

彈丸山

百丈山

灘山

隱山

獨秀山

南溪山

龍蟠山

堯山

雲母山

馬鞍山

慮山

火山

浮石山

景山

盛宏之荊州記曰景山在上洛縣西南二百里東與荊山連接有沮水源出焉其山一名雁浮山荊山之首曰景山雁南翔北歸偏經其上土人由茲改名雁山又為雁塞山

荊山

山海經曰荆山首曰景山金玉是出此即卞和抱璞之處南臨青山北接雁塞通林交麓峭峙相望雖羣峰競起而荆山獨秀卞和得玉於此山獻厲王王使玉人相之曰石也刖其左足厲王薨獻之武王玉人相之又曰石也刖其右足和乃抱璞泣荆山之下

河圖括地象曰荆山為地雌上為軒轅星

荆門山

袁山松宜都山川記曰南崖有山名荆門北對崖有山

曰虎牙二山相對其荆門山在南上合而下空徹山南有像門也

勾將山

袁山松勾將山記曰登勾將山南望見宜都江陵近在目前沮潭沔漢諸山岵岵時見遠眺雲夢之澤晶然與天際四顧總視衆山數千仞者森然羅列於足下千仞以還者蟲嵬如丘浪勢焉今在上洛縣西北

虎牙山

袁山松宜都山川記曰虎牙山有石壁其文黃赤色形如齒牙

孤山

郡國志曰安遠有陸抗故城城之南有孤山袁山松為郡嘗登此山以四望見大江如縈帶舟船如鳬雁焉

高筐山

袁山松勾將山記曰登勾將北見高筐山巖然半天荆州圖副云昔堯時大水此山不沒如筐因以為名焉

佷山

宜都山川記曰佷山谷之內有石穴穴出清泉有神魚大者二尺小者一尺釣者先請多少拜而請之數滿便止水側有異花欲摘之者亦如魚請又有異木名千歲木葉似棗冬夏常青

宜陽山

宜都記曰宜陽山有風井穴大如甕夏出冬入有樵人置笠穴口風喻之入後於長楊溪口得笠則知潛通焉

丹山

宜都記曰丹山時有赤氣籠井如丹故有此名

小酉山

盛宏之荊州記曰小酉上石穴中有書千卷相傳秦人於此講學因留之故梁湘東王云訪酉陽之逸典是也

茅山

盛宏之荊州記曰茅山有蹲鴟如兩斛大食之終身能不飢今民取食之

嵩梁山

盛宏之荊州記曰嵩梁山在澧水之陽望之如香爐之狀今名石門吳永安六年自然洞開玄朗如門三百丈門角上各生一竹倒垂下拂謂之天帚孫休以為嘉祥置縣因山為名隋文帝改曰石門山也

崇山

盛宏之荊州記曰崇山書云放驩兜於崇山在澧陽縣南七十五里

武山

武陵記曰武山高可萬仞山半有盤瓠石窟中有一石狗形云是盤瓠之遺像又有班蛇四眼身大十圍山有水出謂之武漢是也在縣之西

壺頭山

武陵記曰壺頭山在縣東馬援所穿室內有蛇如百斛船云是援之餘靈

天門山

武陵記曰天門山山上有葱如人所種畦隴成行人欲取之先禱山神乃取氣味甚美不然不可得岩中有書數千卷人得見而不可取

黃聞山

武陵記曰昔有臨沅黃道真住黃聞山側釣魚因入桃花源陶潛有桃花源記今山下有潭名黃聞此蓋聞道真所說遂為其名也

風門山

武陵記曰風門山有石門去地百餘丈每欲風起此門先有黑氣若煙隱隱而上斯須風起竟日

石帆山

武陵記曰石帆山危起若數百幅帆形

虎齒山

武陵山記曰虎齒山形如虎齒民嘗六月祭之不然輒有虎害

移山

武陵記曰移山在沂陽界本在江北岸因風雨之勢一夕移渡江南岸後以此名之

淳于山

武陵記曰淳于山與雉山相近在辰州武陵二郡界絕壑之半有一白雉遠望首尾可二丈伸足翔翼若虛中翻飛即上視之乃有一石雉舒翅綴著石上山下有石室數畝望室裏雖闇猶見銅鐘高丈餘十枚其色甚光明

武陵山

武陵記曰武陵山中有秦避世人居之尋水號曰桃花源故陶潛有桃花源記

又云山上有神母祠

平都山

神仙傳云後漢延光元年陰長生於馬名生邀求仙法乃同長生入青城山中煮黃土為金以示之立壇啖血取太清神丹經授之乃別去長生後於平都山白日昇

天即此山是也

山在南賓縣北二里

陽岐山

荆南記曰石首縣陽岐山山無所出不足稱數本屬南平界

范元平記云故老相承云胡伯始以境內無山于此山上計偕簿

君山

博物志曰君山洞庭之山是也帝之二女居之曰湘夫

人帝女遣精衛至王母取西山之玉印印海北山庾穆之湘州記云昔秦皇欲入湘觀衡山而遇風浪溺敗至此山而免因號為君山又荊州圖副云湘君所遊故曰君山有神祈之則利涉山下有道與吳包山潛通上有美酒數斗得飲不死

漢武帝故事云帝齋七日遣藥大將男女數十人至君山得酒欲飲之東方朔曰臣識此酒請視之因即便飲帝欲殺之朔曰殺若朔死此為不驗若驗殺亦不死帝

赦之

小廬山

衡山圖經曰小廬山一名浮丘山在縣西一百八十里
高六里三十步東西二十里南北四十里言其山似九
江廬山故名小廬山

又故老相傳謂浮丘公上昇之所兼有道觀存焉

靜福山

衡山圖經曰靜福山在縣北五十里有梁廖冲者守清

虛為本郡主簿西曹祭酒湘東王國常侍大同三年家
於此山先天二年飛昇於此山後刺史蔣防敬慕高風
刻石焉

方臺山

蕭誠荆南志曰華容方臺山出雲母土人採之先候雲
所出之處於下掘取無不大獲往往有長五尺者可以
為屏風當掘之時忌有聲響則所得廉惡

攸縣雲陽山

遁甲經曰沙土之地雲陽之墟可以避時可以隱居雲陽氏古之仙人姓氏因號雲陽山在攸縣

仙方記云南嶽縣有福地有松膏實甘鮮可餌相傳云服食練行之人多來採此松膏而服之不苦澁與諸處松有別

烏龍白騎山

湘川記云汝城縣東有烏龍白騎山遠望似城有黑石如龍白石如馬羅列號曰烏龍白騎山

文斤山

湘川記曰耒陽文斤山上有石牀方高一丈四面綠竹扶疎常隨風委拂此牀大旱則禱雨時應

石燕山

甄烈湘川記曰石形似燕大小如一山明雲淨即翩翩飛翔

羅含湘中記云石燕在零陵縣雷風則羣飛翩翩然其土人來採有乾者今合藥或用

萬歲山

盛宏之荊州記曰黃箱山一名黃岑山在東南三十里其柳水所出即是五嶺之一從東第二騎田嶺是也又有浪井井三日一涌

麓山

盛宏之荊州記曰長沙西岸有麓山其下有精舍左右林嶺環迴泉澗精舍旁有一石每至嚴冬其上的不停霜雪

宋淵麓山記曰山足曰麓蓋衡山之足也

昭山

宋永初山川記曰昭山下有泉潭深無底是湘水最深之處昔有舟人覆於此潭其槽并甌有名題號後於洞庭尋得即知暗通也

五溪山

長沙圖經曰五溪山在縣西北五十八里高二里北入朗州界吳黃龍三年潘濬將軍五萬討武陵五溪蠻在

此山立營截住徒黨因以為名按溪水自郡州武剛縣東北流至岳州沅江縣合益水益陽城記云在益水之陽水出縣北流入資口在縣門橋下皆五溪之下口也又關雲長屯軍資水北按即一名茱萸江也吳甘寧拒之云聞吾咳唾彼即不敢過江是此處今號為雲長瀨

錢石山

湘川記曰曲江縣東有錢石山其狀四方有石臺其石三面壁立其上碎石如錢故謂之錢石山

采玉山

湘川記曰曲江縣有采玉山卉木滋茂泉石澄徹相傳云採玉於此因以得名

玉山

湘川記曰玉山下有廟曾有人得玉璞於此有銀山白石山越王山又浮山其地躡一處則百餘步地動

臨賀山

盛宏之荊州記曰臨賀山東山中有二竹大數十圍有

盤石徑四丈極方正如彈碁局兩竹屈垂拂掃石上絕無塵穢未至數十里聞風吹若簫管之聲

馬嶺山

郡國志曰郴州馬嶺山本名牛脾山山上有仙人蘇耽壇即郴人也為兒童時與衆童牧更直守牛每耽守牛牛不敢散嘗與衆兒獵即乘鹿人笑之曰龍也去郡百二十里母臨食晚往買鮓須臾即還一日有衆賓來耽啓母曰受性當仙仙人合招耽去今年疾疫甚飲家中

井水即無恙又種藥於園梅樹下可治百病買此水及藥過於供養便去毋遽視之衆賓皆白鶴也以耽常乘白馬故號馬嶺山

彈丸山

水經注曰臨桂彈丸山有涌泉奔流迅激東注於灘水山龕及溪中有石如彈丸因以石名焉驗其山有石竇下深數丈洞穴深遠莫究其極

百丈山

桂林風土記曰百丈山在郡城東北七十五里一名把杖山疊障深重遠延西南數百里四接郡界莫窮遠近自府北驛路徑穿其中俗以崎嶇險阻故以百丈名之又以林巒深邃人皆持兵以防猛獸因此亦名把杖山

灘山

桂林風土記曰灘山在城南二里灘水之陽因以名焉一名沉水山其山孤拔下有澄潭上高三百餘尺傍有洞穴廣數丈南北直透上有怪石欹危藤蘿榮茂世亂

民保以避寇旱或禱祀頗靈

隱山

桂林風土記曰隱山在州之西郊先是榛莽翳薈古莫知者竇厯初李渤出鎮遂尋其源見石門半開有水淵澈乃夷薙蕪穢疏通岩穴石林磴道若天造靈府不可根本因號隱山

獨秀山

桂林風土記曰獨秀山在城西北一百步直聳五百餘

尺週圍一里平地孤拔秀異下有洞穴凝垂乳竇路通
山北傍園百餘丈豁然明朗宋光祿卿顏延年牧此郡
常於此石室中讀書遺跡猶存嘗賦詩云未若獨秀者
嵯峨郭邑開是也

南溪山

桂林風土記曰南溪山在縣之東五里餘其山聳拔千
尺烟翠凝空近郡所少其溪東注與桂江合

龍蟠山

桂林風土記曰龍蟠山本名盤龍山有石洞深致洞中天然石牀石盤洞門數重人秉燭遊常見龍跡跡大如椀洞有水水中有魚四足有角如龍形人殺之即風雨晦冥前使李渤給事改為隱山連其所也

堯山

郡國志云廣州堯山高四千丈自番禺交趾見之有颶風風發折樹翻湖焉

雲母山

續南越志云天后朝曾城縣有何氏女服雲母粉得道於羅浮山山因所出以名之

馬鞍山

南粵志曰始皇朝望氣者云南海有五色氣遂發卒千人鑿之以斷山之崗阜謂之鑿龍今所鑿之處形如馬鞍故名焉

慮山

裴關廣州記云東莞縣有慮山其側有楊梅山桃只許

於山中飽食不得取下如取下山輒迷路徑

火山

嶺表錄云梧州對岸西火山山下水澄潭水深無極其
火每三五夜一見於山頂每至一更初火起匝其頂如
野花之狀深廣十丈餘少頃而息或言其下有寶珠光
照於上如火上有荔枝四月先熟以其地熱故為火山
也

浮石山

交州記云海中有浮石山而峙高數十丈去永平營百
餘里浮在水上

太平御覽卷四十九

欽定四庫全書

太平御覽卷五十

宋 李昉等 撰

地部十五

隴塞及海外諸山

隴山

小隴山

朱圉山

契吳山

可監山

門石山

燕然山

天山

祁連山

焉支山

勿居山

臨松山

三危山

羊鵲山

西王母樗蒲山

九隴山

鴻鷺山

沙角山

葱嶺

巫咸山

懸度山

頭痛山

鐵山

青山

石崖山

䟽屬山

侖山

蛇山

東口山

流波山

鈎吾山

天臺山

鵲山

小次山

長古山

基山

猥翼山

峯山

亶受山

耆閤窟山

靈鳥山

隴山

說文云隴山天水坂也辛氏三秦記引俗歌云隴頭流水鳴聲幽咽遙望秦川肝腸斷絕

酈道元水經注云縣西山謂之小隴岩障高嶮不通軌轍故張衡四愁詩云我所思兮在漢陽欲往從之隴坂長是也周地圖記云其山高處可三四里登山東望秦

州可五百里目極泯然墟宇桑梓與雲霞一色其上有
懸溜吐於山中為澄潭名曰萬石潭流溢散下皆注於
渭東人西役升此而望故鄉莫不悲思其歌云隴頭流
水流離四下念我行役飄然曠野登高望遠涕零雙墮
是此山也

小隴山

三秦記曰小隴山一名隴坻又名分水嶺

漢書揚雄解嘲云響若坻頽應劭曰天水有大坂名隴

山其旁有崩落者聲聞數百里故曰坻頽

又曰其坂九迴上者七日乃越上有清水四注下有隴縣因此水而名

朱圉山

漢書地理志曰天水冀縣有朱圉山一名岩山在縣城南

十三洲志云朱圉有石鼓不擊自鳴則兵起

契吳山

涼州記曰契吳山在縣北七十里赫連勃勃北遊契吳而嘆曰美哉斯阜臨廣澤而帶清海吾行地多矣自嶺以北大河以南未有若斯之壯麗也

可監山

涼州記曰可監山一名都廬山皆涇水源與筭頭山連亘赫連定勝光二年畋于涼州登可監山望統萬城泣曰先帝若以朕承大業豈有今日在平涼縣縣接百泉界又云定據平涼登此山有羣狐繞之而鳴射之竟不

得一定乃歎曰咄此亦怪事也

石門山

酈道元水經注瀕水又東經石門口山高嶮峻絶對岸
若門故以得名疑即臯蘭山門也漢武元狩三年驃騎
將軍霍去病出隴西至臯蘭謂是山之關塞矣

燕然山

漢書曰貳師將兵還至燕然山單于知漢軍勞倦自將
五萬騎遮擊貳師軍大敗

范蔚宗後漢書竇憲與單于戰於稽落山大破之降者
前後二十餘萬人遂登燕然山去塞三千餘里刻石勒
碑令班固作銘

天山

漢書曰漢使貳師將兵三萬騎出酒泉擊右賢王於天
山得首數萬級而還

又且西彌國王治天山東大谷去長安八千六百七十
里續漢書曰竇固出塞至天山斬首千餘級

水經注曰陰山故卽侯應言於漢曰陰山東西一千餘里單于之苑囿也自武帝出師攘之於北漢匈奴過之未嘗不哭謂失此山也

西河舊事曰天山高冬夏常雪故曰白山山中有好木鐵匈奴謂之天山過之皆下馬拜在蒲海東一百里卽漢貳師擊右賢王之處也

山海經曰天山多金玉有雄黃英水出焉而西流注於湯谷有神鳥狀如黃囊赤如丹火六足四翼渾沌無面

目是識歌舞實惟帝江

九州要記曰涼州古武都有天山黃帝受金液神丹於此山山近崆峒山山頂有魏太祖馬埕焉

祁連山

漢書曰霍去病擊匈奴至祁連山濟居延水遂臻小月氏西河舊事曰祁連山在張掖酒泉二界焉支山在刪丹故縣東西百餘里南北二十里亦宜六畜匈奴失二山乃歌曰亡我祁連山使我六畜不蕃息失我焉支山

使我婦女無顏色

涼州記曰祁連山張掖酒泉二界之上東西二百里南
北百餘里山中冬溫夏涼宜牧牛乳酪濃好夏日酪不
用器物刈草著其上不散酥特好酪一斛得升餘酥又
有仙人樹行人山中飢渴者輒食之飽不得持去平居
不可見

焉支山

漢書曰霍去病將萬騎出隴西涉孤奴水過焉支山千

有餘里執渾邪王收休屠祭天金人

涼州記曰焉支山在西郡界東西百餘里南北二十里有松柏五木其水草茂美宜畜牧與祁連同一名刪丹山

勿居山

後魏書曰張襄從太祖破賀訥登勿居山聚石為峰以記功德命襄為文

臨松山

十六國春秋曰西晉元嘉元年張掖臨松山有石如張掖字掖字漸滅張字分明又有文曰初祚天下西方安萬年後魏太和中置臨松郡故城在此山下臨松山一名馬蹄山又云丹松嶺

三危山

河圖括地象曰三危山在鳥鼠之西南與汶山相接上為天苑星黑水出其南

西河舊事曰三危山有三峯故曰三危俗亦謂昇雨山

在縣南二十里

尚書禹貢謂竄三苗于三危又云導黑水至于三危入于南海

西山經曰三危之山青鳥居之三青鳥至西王母取食者別自栖息于此山也

羊鵲山

陔國沙州記曰羊鵲山多岩石少樹木甚似魯國南鄒山傍山北行三十里遠眺顧瞻百里但見峻嶺巉岩無

尺木寸草

西王母樗蒲山

崔鴻十六國春秋曰甘松山東北又二百里有西王母樗蒲山大有神驗江水出焉

段國沙州記曰羊鵲嶺東北二百里有大山遙望甚似東岳岱山極高大嶮峻頗有靈驗西羌父老傳云是西王母樗蒲山

九隴山

周地國記曰昔有神人坐張掖西方上山西射酒泉郡
西金山之白神射得九籌畫北山上遂成九隴因以為
名

鴻鷺山

穆天子傳曰天子循黑水至于璧玉之山謂此也今名
為鴻鷺山以多鴻鷺所棲也

沙角山

三秦記曰河西沙角山峰岩危峻逾於石山其沙粒靡

有如乾糲又山之陽有一泉云是沙井泉歷今古沙不填之人欲登峰必步下入穴即有鼓角之音震動人足又西山舊事云沙洲天氣晴朗沙鳴聞於城內

又云人遊沙山或結侶少或不曾遊必生怖懼莫敢前沙或隨人足自頓下經宿却自還山上

在縣西七里亦名烏沙山

葱嶺

漢書曰西域三十六國有葱嶺其河兩源一源出葱嶺山一出于閼國在南山下其河北流與葱嶺河合

廣志曰葱嶺山其上生蔥茂于常蔥

西域諸國志曰葱嶺高十二日可至頂

巫咸山

西域志曰巫咸山一名覆莫山

水經注曰鹽水西出經巫咸山北

山海經曰巫咸山之神以右手操青蛇左手操赤蛇在葆登羣巫所從上下也

又大荒西經云大荒之中有靈州巫咸即巫盼巫彭巫

姑巫直巫抵巫謝巫羅十里巫從此昇峰百藥爰在郭
璞註云羣巫山下靈仙採藥往來也蓋神巫所遊故以
得名

懸度山

漢書曰烏秬國有懸度山者谿谷不通以繩索相引而
度

頭痛山

漢書曰杜欽說大將軍王鳳曰蜀賓國自知絕遠兵不

可至道厯大頭痛山小頭痛山赤土身熱之坂道狹者尺六寸長徑三十里

漢書曰蜀賓國厯大頭痛山有三池盤石坂道狹者尺六七寸繩索相引乃度

廣志曰大頭痛山小頭痛山皆在蜀賓東

鐵山

漢書曰莎車國有鐵山出青玉穆天子傳曰天子西征至剗居議切問氏乃命剗問氏供養六師之人于鐵山之

下天子祭鐵山

青山

水經注曰北地富平縣西河側有兩山相對水出其間即上河峽也世謂之青山河水歷峽北注支分東出也

石崖山

水經注曰塞外歷城有石崖山西去北城五百里山石且自然有文畫獸馬之狀粲然成著頗似圖寫故亦謂之畫石山

䟽屬山

山海經曰貳負之臣曰危與貳負殺寔寐帝乃梏之䟽

屬之山

梏繫縛也

桎其右足

桎械也

反縛兩手與髮

約髮合縛之也

繫

之山上磐石之下在開題西北

漢宣帝時使人鑿上郡發磐石石室中得一人

徒保被髮反縛械一足時人不識乃載之于長安帝以問羣臣羣臣莫能知劉子政案此言之宣帝大驚于是時人爭學山海經矣論者多以為是其尸像非真體也意識者以為靈怪變化難以理測物稟異氣出于自然不可以常理推之可以近較察之矣魏時有人發周靈王冢得殉葬女子不死至數日而有氣數日而能言狀如二十許女子而人送詣京師郭太后愛養之恒不離左右十餘年太后崩哀思哭泣一年餘而死即此類也

侖山

音論

山海經曰侖山者其山上有金玉下多青腹有木狀如
殼而赤理其汁如漆其味如飴食者不飢可以釋勞其

名曰白若

或作臯蘓臯蘓一名白若見廣推

可以血玉

血謂可以染玉作光彩也

蛇山

山海經曰北海之內有蛇山有水出焉東入于海入于

海有五采之鳥飛蔽之

漢宣帝元康元年五色鳥以萬數飛屬即此鳥

五采之

鳥名曰鷖鳥

鳳屬也離騷曰鷖玉虬以乘鷖兮

東口山

山海經曰東口之山君子之國其人衣冠帶劍

從使虎豹好謙

讓有司幽之民帝俊生星龍星龍生思幽思士不妻思

女不夫

言其人直思而氣通魄合而生子此莊子所謂白鶴相視眸子不運而風化之類也

食黍

食獸是使四鳥

流波山

山海經曰東海中有流波山入海七十里其上有獸狀如牛蒼身而無角一足入水則必有風雨其光如日月

其音如雷名曰夔黃帝得之以其皮作鼓厥以雷獸之

骨

雷獸則雷神獸
龍身厥擊也

聲聞五百里以威天下

鈎吾山

山海經曰鈎吾山其上多金其下多銅有獸焉羊身人面而目在掖下虎齒人爪其音如嬰兒名曰狍號食人

左傳所謂

饕餮也

天臺山

山海經曰大荒之中有山名曰天臺海水入焉

鵲山

山海經曰鵲山其首中曰招搖臨于大海之上多桂

桂葉

似杜杞長尺餘味辛白花叢生山間多金玉有草木其無雜木呂氏春秋曰招搖之桂是也

狀如韭而青花其名曰祝餘

或作程茶

食之不飢有木焉其

狀如穀而黑理

穀楮也皮作紙

其花四照

言有光燄也若木花赤光照下見赤亦此

類也見離騷註

其名曰迷穀佩之不迷

小次山

山海經曰小次山山上多有玉下多銅有獸如獬白首

赤足名曰未厭見則有大兵

長古山

山海經曰長古之山無草多木有獸焉狀如禺而四耳

名長古

因山出此獸故名之

音如吟

如人呻吟聲

見則郡縣大水

基山

山海經曰基山其陽多玉其陰多金多怪木有獸焉其

狀如羊九尾四耳其目在背其名曰搏訖

搏施二音

有鳥焉

其狀如雞而三首六目六足三翼其名曰鷖鷖食之無

卧

猥翼山

山海經曰猥翼山其中山多怪獸水多怪魚

凡言怪者皆為狀貌

奇崛不常也尸子云徐偃沕水而得怪獸爭列於庭

崆山

崆音密

山海經曰崆山山上多丹木員葉赤莖黃花赤實味如

飴食之不飢丹水出焉西注稷澤

后稷神所憑因名

其中多白

玉膏其源沸沸湯湯

玉膏涌出之聲也河圖云少室山有白玉膏服即仙矣亦此類也

黃帝是食饗

所以得登龍於鼎湖而靈化也

是生玄玉

言膏玉中又出黑玉也

膏所出以灌丹木丹木五歲五色乃清

言鮮潔也

五味乃馨

言滋香也

黃帝取崆山之玉榮

謂玉華也

而投之鍾山之陰

以為玉種

瑾瑜之玉為良玉也堅栗精密

禮記鎮密以栗或作粟玉有栗文所謂穀璧也

潤澤有光

澤謂潤澤也

五色發作以剛以柔天地鬼神是食

是饗

玉所以為祈祭者言能動天地感鬼神也

君子服之以衛不祥

今激外出金剛

玉石屬似金有光彩可以刻玉外國人帶之云辟惡氣也

亶受山

山海經曰亶受山多水無草木不可以上

言崇峭也

有獸焉

其狀如狸而有髮其名曰類

或作施

自為牝牡食者不妬

莊子亦曰類自為雌雄
如今豕猪亦雌雄也

耆闍窟山

法顯記曰耆闍窟山未至頂三里有石窟佛本于此坐
禪天魔波旬化作雕燕住窟前以恐阿難佛以神力隔
石舒手摩阿難頂怖即得止鳥跡手文今悉在故名雕
燕窟山前有四佛坐處

靈鳥山

支曇譚靈鳥山銘序曰昔始來遊王舍城憩靈鳥山舊
云其山峰似鳥而威靈故以為名焉衆美咸歸壯麗畢
備

太平御覽卷五十

欽定四庫全書

太平御覽卷五十一

宋 李昉等 撰

地部十六

石上

石上

釋名曰山體曰石石磔也

音落一作格

堅捍磔也山多大石

曰礧

口學切

礧學也大石之形學學然山多小石曰礧

石交

切礧堯也每石堯堯獨處而出也礧小石也磊當罪切衆

石也礧

壯浪切

大石也琅玕石似珠也砮砮石似玉也

易曰困於石據于蒺藜

又說卦曰艮為小石

書禹貢青州貢鉛松怪石

孔安國曰怪異好石似玉

又曰泗濱浮磬

孔安國注云泗水濱崖也水中見石可以為磬也

詩曰我心匪石不可轉也

又曰漸漸之石維其高矣

又曰他山之石可以攻玉

禮曰昔者夫子居於宋見桓司馬自為石槨三年而不成

桓司馬宋向戌孫也名魋也

夫子曰若是其靡也死不如速朽之愈也

又曰今夫山一拳石之多及其廣大草木生之禽獸居之寶藏興焉

周禮曰王行洗乘石

乘石王所登上車之石

又曰石有時而泐

音勒也解散也

又曰大司寇以嘉石平罷民有罪者坐諸嘉石以肺石

達窮民凡熒獨老幼欲復於上而未達者立於肺石

注曰

嘉石丈石也

肺石赤石也

傳曰隕石于宋五隕星也

注曰但直言星則嫌星使石隕故重言隕星

又曰齊高固入于晉師築石以投人

又曰昭八年石言於晉魏榆晉侯問於師曠曰石何故言對曰石不能言或憑焉不然民聽濫也抑臣又聞之曰作事不時怨讟動於民則有非言之物而言今宮室崇侈民力彫盡怨讟並作莫保其性石言不亦宜乎

春秋說題辭曰周易艮為山為小石石陰中之陽陽中之陰陰精補陽故山合石石之為言託也託立法也史記曰始皇三十六年墜星於東郡至地為石或刻其石曰始皇帝死而地分始皇聞之盡誅石旁居人燔銷其石說苑云石隕東郡是也

又曰王翦代李信擊荊兵數挑戰終不出久之翦使人問軍中戲乎對曰方投石超距翦曰士卒可用矣又曰張良見老人于圯上出一編書曰讀是則為王者

師後十三年見我濟北穀城山下黃石即我也良後果見黃石寶而祠之及死并葬黃石伏臘祀之

又曰李廣出獵見草中石以為虎而射之中石沒鏃視之石也因復射之終不能復入石矣

後漢書曰梁鴻妻孟光有力能舉石曰

趙岐曰吾死後置一圓石于墓前刻曰漢有逸人姓趙名岐有志無時命也奈何

謝承後漢書曰吳郡馬皓父為南郡太守坐事繫獄皓

懷小石至公卿門輒出石叩頭流血覆面父遂得免
東觀漢記曰涿郡太守張豐舉兵反初豐好方術有道
士言豐當為天子以五采囊盛石繫肘云石中有玉璽
豐信之遂以反既當斬猶曰肘有玉璽椎破之豐乃知
被詐仰天歎曰當死所無恨

又曰吳郡陸績為鬱林太守歸過洞庭湖舟輕載黃石
壓之謂之廉石

魏略曰梁州抑谷有石無故自崩石中有犬如馬之狀

後司馬氏得天下之應

又曰大秦國石為城郭山出九色玉石

魏志曰魏明帝增崇宮殿雕飾觀閣鑿太行之石英採
穀城之文石起景陽山於芳林園建昭陽殿於太極之
北

又曰辰韓在馬韓之東兒生便以石壓頭欲其匾今辰
韓人頭皆匾

又曰公孫度為遼東太守時坐大石長丈餘下有三小

石為足

魏武帝末年鄴中雨五色石

王隱晉書曰永康元年襄陽郡上言得鳴石鐘聞七八里

石勒傳曰初勒鄉里所居原上地中石生日長類鐵之象

又曰陳總遷殿中侍御史詔遣詣終南山請雨總先除小石祠惟存大石一所而祈之上文曰峩峩大石佐岳

通理含滋吐潤惠我四海

又曰孫子荆謂王武子曰當枕流漱石曰石非可漱流
非可枕孫荅曰枕流洗其耳漱石礪其齒

晉陽秋曰董威輦遁去莫知所之於其寢所得一石及
竹子并詩二首

齊書曰虞愿為晉平太守海邊有越王石常隱雲霧相
傳云清廉太守乃得見愿往觀視清澈無隱蔽

南史曰到溉山池有奇礪石長一丈六尺梁武愛之喻

焉即迎置華林園居殿前移石之日都下傾城縱觀所謂到公石

趙書曰劉曜築建德殿取土城西得圓石狀若水碓其銘曰律權石重四鈞同律度量衡有辛氏造議者未之詳或以為瑞叅軍續咸曰王莽時物

後周書曰高琳母嘗被泗濱遇見一石光彩朗潤遂持以歸是夜夢見一人衣冠有若仙者謂其母曰夫人適所將來之石是浮磬之精能寶持必生令子其母驚寢

便舉體流汗俄而姪及生子因名琳字季珉也

隋書曰帝令江都郡丞王世充發淮南兵擊劉元進有大流星墜於江都未及地而南逝磨拂竹木皆有聲至吳郡而落于地元進惡之令掘地入二丈得一石徑丈餘後數日失石所在

唐書曰車騎將軍劉山濤言高祖龍潛時數往來洛郊之莊舍嘗踐石子靴迹見於石中至今猶在高祖令鑿之深寸餘其迹逾明乃止

又曰則天時有人於洛水中得白石數點赤詣闕輒進
諸宰相詰之對曰此石赤心所以來進李昭德叱曰此
石赤心洛水中餘石豈能盡反耶左右皆笑

又曰薛元超道衡孫也為中書舍人省有盤石初道衡
當日為侍郎時嘗踞而草制元超每見此石未嘗不泣
然流涕

又曰甘露事敗王璠舉家無少長皆死初璠在浙西繕
城壕役人掘得方石有十二字云山有石石有玉玉有瑕瑕

即休璠視莫知其旨京口老人講之曰此石非尚書之吉兆也尚書祖名崧崧生礎是山有石也礎生尚書是石有玉也尚書之子名瑕休休絕也庸非吉徵果赤族老子曰硤硤如石

列子曰昔者女媧煉五色之石以補天

淮南子亦載

又曰趙襄子卒徙十萬狩於山中藉苐燔林煽赫百里有一人從石壁中出隨烟燼上下衆謂鬼物察之人也孫卿子曰以桀詐桀猶有巧拙以桀詐堯若卵投石

又曰負石而走赴河行之難為者也而申徒狄能之
闕子曰宋之愚人得燕石於梧臺之東歸而藏之以為
大寶周客聞而觀焉主人端冕玄服以發寶華賁十重
緹巾十襲客見之盧胡而笑曰此燕石也與瓦甃不異
主人大怒藏之愈固

符子云水生石未有居山而溺者火生木未有抱樹而
焦者

呂氏春秋曰石可破也而不可奪其堅

淮南子曰禹娶塗山化為石在嵩山下後方生啟曰歸我子石破北方而生啟

畢萬術曰埋石四隅家無鬼

取蒼石四枚及桃七枚以桃弧射之乃分置四隅無

殃鬼

抱朴子曰白石似玉姦佞似賢

又曰磁石引針

又曰浮磬息音未別於衆石

又曰燒泥為瓦燭木為炭蜂窩為蠟水沫為浮石

隨巢子曰禹產於崑石啟生為石

王昭之云啟生而母化為石

六韜曰武王伐殷得二大夫而問之曰殷國將亡亦有妖乎其一人對曰殷國常雨血雨灰雨石小者如鷄子大者如箕武王曰大哉妖也

樂資春秋傳曰秦始皇使鄭客將入函關見華山上有素車白馬疑是鬼神熟視稍近問鄭客曰安之荅曰之咸陽素車人曰止吾華山使願託一牘書致鎬池君所子之咸陽道過鎬池見一大梓樹有文石以款樹當有

應者即以書與之鄭客如其言以石擊梓樹果有人來取書與之

吳越春秋曰禹案黃帝中經見聖人所記曰在乎九疑山東南號曰宛委承以丈玉覆以盤石其書金簡玉字禹乃退齋三日發石取書

荆楚歲時記曰張騫尋河源得一石示東方朔朔曰此石是織女支機石何至於此

神仙傳曰壺公內費長房於石室中頭上有大石方數

大以茅繩懸之諸蛇競齧且斷長房不移公撫之曰子
可敬矣

又曰介象字元則會稽人入山求神仙見谷有石子皆
紫色大如鷄子象取二枚見一美女被服五采象叩頭
乞長生女曰急送汝手中物還著故處象送石還女授
以丹方一首

列異傳曰汝寧女子戴氏久疾出見小石曰爾有神能
差我疾者當事汝夜夢人告之吾將祐汝後漸差遂為

立祠名石侯祠

益都耆舊傳曰公孫述時蜀武擔山石折任文公曰西州智士死我將死矣後三月果卒

韓詩外傳曰楚渠子夜行見寢石以為伏虎彎弓而射之沒金及羽下視之其石也因復射之矢摧無迹

漢書載李

廣亦如之

文士傳曰魏文帝之在東宮也宴諸文學酒酣命甄后拜坐者坐者咸伏惟劉楨平仰觀之太祖以為不敬送

徒隸簿後太祖乘步牽車乘城降閱簿作諸徒咸敬而
楨坐磨石不動太祖曰此非劉楨耶石如何性楨曰石
出荆山玄巖之下外炳五色之章內秉堅貞之志雕之
不增文磨之不加瑩氣質貞正稟性自然太祖曰名豈
虛哉

神仙傳曰白石先生煮白石為糧就白石山居故號曰
白石先生

穆天子傳曰天子升於采石之山於是取采石鑄以成

器于黑水之山

三齊略記曰始皇作石塘欲過海看日出處時有神人驅石下海石去不速神輒鞭之皆流血至今石悉赤陽城山盡起立嶷嶷東傾狀如相隨行

事具神部

盛宏之荊州記曰興安縣水邊有平石其上有石櫛石履各一具俗云越王渡溪脫履墮櫛於此

郭緣生述異記曰秦梁圯名也或曰秦始皇東巡弗行舊道過此水率百官以下人提一石以填之俄而梁成

今觀所累石乃無造作跡也

搜神記曰常山張顥為梁州牧天雨後有鳥如山鵲飛翔入市而忽然墮地人爭取化為圓石顥命椎破得一金印文曰忠孝侯印

太平御覽卷五十一

欽定四庫全書

太平御覽卷五十二

宋 李昉等 撰

地部十七

石下

石下

西京雜記曰竇太后在家嘗有白燕銜石大如指墮后
績筐中取石剖為二其中有文曰母天地后乃合之遂

不復開後為皇后帝并置璽中為天璽

又曰五鹿充宗受學於彌成子彌成子少時常有人過已授以文石大如鷄卵成子吞之遂大明悟為天下通儒成子後病吐出此石授充宗充宗復吞又為明學

又曰漢武昆明池養魚往往飛去後刻石為鯨魚致水中乃不飛去每至雷雨鯨魚鳴吼

潯陽記曰石鏡山東一圓石懸崖明淨照人微細必察幽明錄曰宮亭湖邊傍石間有石數枚形圓若鏡明可

鑑人謂之石鏡後人過以火燎一枚今不復明其人眼
遂失明

庾仲雍湘州記曰應陽縣蔡子池南有石白云是蔡倫
造紙白也

王歆之南康記曰歸美山出石紅丹赫若采繪嵯嵯秀
上九霄

隣景明曰女媧石大風雨後天澄氣靜聞管絃聲

拾遺記曰員嶠山東有雲石廣五百里駁落如錦扣之

片片蓊然雲起

又曰魏明帝時太山下有連理文石高十二丈狀如枯樹其文色彪發似人雕鏤自下及上對峙百餘步及魏明帝之始稍覺相近如雙闕也土石陰類魏為土德斯為靈異

交州記曰有浮石山在海中虛輕可以磨脚煮飲之止渴洞冥記曰元鼎中條支國貢馬肝石以和九轉丹有髮白者以此拭之應手而黑

顧野王瑞應圖曰石華者石生華也

劉澄之江州記曰興平縣蔡子池南有石穴深二百許
產文石堪為書硯

蜀中記曰隗叔通棘人也性至孝母每食必須江水通
每汲江中石為之出今江中有石號孝子石

十洲記曰流洲在西海中上多積石名為昆吾石治其
石成鐵作劍光明照洞如水晶狀割玉物如切泥土焉
益州記龍盤山有一石長四十丈高五丈當中有戶及

靡若人掩閉故老相傳玉女房

石虎鄴中記曰孟津河東去鄴城五里有濟北郡穀城縣有穀城山是黃石公所葬處有人登此山見崩土中有文石石文鮮明虎使採取以治宮殿又免穀城令不奏聞故也

潯陽記曰落星石在宮亭湖中周迴百餘步高五丈上有竹林

武昌記曰陶太尉廟東有盤龍石舊傳云龍盤於此石

梁州記曰沔陽城泝漢上十五里有諸葛武侯所鎮在漢水南背山向水門前累石以為陣

荊州圖經曰宜都有穴穴有二大石相去一丈俗云其一為陽石一為陰石水旱為災鞭陽石則雨鞭陰石則晴即稟君石是也但鞭者不壽人頗畏之不肯治也

丹陽記曰石頭城西有唐顏石王敦害周伯仁之所

又曰姑熟縣晉惠帝永寧三年湖中有大石去渚二百步浮來登岸百姓驚觀咸曰石來有水明年果有水入

揚州

裴淵廣州記曰甘泉縣平野中孤石挺起峯秀入雲連石相接無異棟宇

安城記曰石室中有素石數斛狀如雀頭甘潤虛脆殆可噉

曹叔雅異物志曰豫章有石黃色白色而理疎以水灌之便熱以鼎加其上炊足以熟冷則灌水雷煥以問張華華曰然石也

漢官儀曰馬伯登泰山見石二枚其一是武帝時石用
五車載不能上因置山中為屋號五車石一是刻號記
功德立壇上

始興記曰營口北有逃石一名靈石晉永和有飛
仙衣冠自來憩此石旬日乃去之

盛宏之荊州記曰臨賀郡有青石上有磨刀斧迹春夏
明淨秋冬蕪穢云是雷磨石

又曰築陽粉水口有一石下不測出地尺許圍可三尺

色極青其上如研明可鑒人相傳以為殞星縣西有孤石挺出其下臨潭或有見根者如竹根

又曰樊重母畏雷為石室避之悉以石為階砌今猶存又曰臨賀馮乘縣東五里有故縣廟相傳漢淮南王安被誅其子奔逸來至一夜忽化為石人當縣門而立百姓怪而觀之其迫察者手足無不泥爛

述異記曰鏡湖俗傳軒轅氏鑄鏡於湖邊今有軒轅磨鏡石石上常潔不生蔓草

輿地志曰會稽秦望山始皇刻石前有石廣數丈云是
始皇坐之石兩邊有方石八方云是丞相已下坐石故
今有丞相石之名

玄中記曰天下之强者東海之沃焦石焉方三萬里海
水灌之隨盡故水東流而不盈

又曰玉門之西南有一國國中有山山上有廟國人歲

歲出石磻子林切數千枚名為霹靂磻從春雷而磻減至

秋磻盡

鄱陽記曰錢倉石在饒州西一百里石形如倉圉有漁人夜宿石下忽見石開窺見石中有錢取之盈艇而去因為名

郡國志曰乞子石在馬湖南岸東石腹中出一小石西石腹中懷一小石故楚人乞子於此有驗因號乞子石又曰思州金鷄石每有鷄鳥鳴於石上

又曰仙人石曾有飛仙人下此石一曰仙人牀

又曰協州弄棟縣晴蛉水下有石猪母子數十頭云夷

人昔牧於此猪化為石今夷人不敢於此牧

又曰儋州昌化湖明山山有二石如人形云有兄弟二人向海捕魚因化為石號曰兄弟石也

又曰桂州興安縣有卧石一枚其形似人而舉體青黃隱起俗謂之石神可以祈雨小舉則小雨大舉則大雨郡國志曰馬嶺嶠上多虺蛇毒殺人有冷石可以解之屑著瘡內即愈

又曰梁州女郎山張魯女浣衣石上女便懷孕魯謂邪

淫乃放之後生二龍及女死將殯柩車忽騰躍昇此山遂葬焉其水傍浣衣石猶在謂之女郎山

又曰柳州城北七十里有話山孤石特竦仙人於此處談話

輿地志曰南陵縣有女觀山俗傳云昔有婦人夫官於蜀屢愆秋期憂思感傷登此盼望因化為石如人之形所牽狗亦為石今狗形獨存

博物志曰鸛水鳥也伏卵時數入水卵冷取礬石周圍

繞卵以助暖氣故方術家以鸛巢中譽為藥

華陽國志曰汶山有鹽石煎之得鹽

異苑曰滕放太元初枕文石枕卧忽暴雨震其所枕傍人莫不懾而放微覺有聲

又曰永康王曠井上有一洗石時見赤氣後有二胡人寄宿忽求買之曠怪所以未及度錢子婦孫氏覩二黃鳥鬬於石上疾往掩取變成黃金胡人不知索市愈急既得撞破內止有二鳥迹

劉敬叔異苑曰晉武帝時吳郡臨平岸崩出一石鼓打之無聲以問張華華曰可取蜀中桐材刻作魚形扣之則鳴於是如其言叩之聲聞數十里

異物志曰夷州土無銅鐵磨礪青石以作弓矢此石砮楛矢之類

物理論曰土精為石石氣之核也氣之生石猶人筋絡之生爪牙也

博物志曰桃林在弘農湖縣醴牛之山有石焉曰帝臺

之基也五色而文狀鴉卵焉

遊名山志曰芙蓉渚有聳石頭如初生芙蓉色皆青白
山海經曰燕山多嬰石言似玉有采嬰帶所謂燕石也
又曰錢來之山多洗石若澡洗可礪去垢也

水經注曰象林郡功曹姓區有子名達攻縣殺令自號
為王值世亂離林邑遂立後乃襲代傳位子孫三國鼎
爭未有所附吳有交土與之隣接進侵壽冷以為疆界
自區達以後國無文史其先篡代世數難詳宗嗣絕滅

無復種裔外孫范熊代立人情樂推後熊死子逸立有
范文日南西捲縣夷帥范椎奴也文為奴時山邊牧羊
于澗水中得兩鯉魚隱藏持歸規欲私食郎知檢其魚
大慙懼詐云將礪石還非為魚也郎至魚所見是兩石
信之而去文始異之石有鐵文入山中就石治鐵鍛作
兩刀舉刃向鄣因祝曰鯉魚變化治石成刀斫石鄣破
者是有靈神文當得此為國君王斫不入者是無神靈
進斫石鄣如龍淵干將之斬蘆藁由是人情漸附今斫

石尚在魚刀猶傳之子孫

又曰澧水出武陵充縣東逕臨澧零陽二縣故界水之南白石雙立厥岸狀類人高各三十丈周迴四十丈故老相傳曰昔充縣尉與零陽尉共論封境因傷害化而為石

劉義慶幽明錄曰陽羨縣小吏吳龕有主人在溪南嘗以一日棹小船過水溪內見一五色浮石取內牀頭至夜化成一女子也

又曰宜都建平二郡之界有五六峯參差並出上有倚石如二人像攘袂相對俗謂二郡督郵爭界於此

揚雄蜀本紀曰秦王獻五美女於蜀王蜀王遣五丁迎五女見大蛇入山空中五丁引蛇山崩五女上山化為石又曰武都丈夫化為女子顏色美好蓋山之精也蜀王娶以為妻無幾物故於成都郭中葬之以石鏡一枚徑丈高五尺

鄧析書曰譬猶拯溺而唾之以石救火而投之以薪

世說曰武昌陽新縣北山上有望夫石狀若人立者傳云昔有貞婦其夫從役遠赴國難攜弱子餞送此山立望而化為石

兵書曰軍中地生石將可以久居

史記曰以石投水莫之逆也

雜五行書曰婦姑鬪爭取石重十六斤埋門外即罷荀伯子臨川記曰石廩狀似倉廩其內可容千斛廩口開則歲儉閉則年豐

又曰石龍山有巖其下有石形隱起似龍尾長一丈二尺

地理記曰有鱗甲因號為石龍

又云石鼓在宜黃水邊狀如鼓形濶九尺長一丈四尺四寸

又云圓淨如鼓因以鼓為名焉

又云鼓石高五尺在宜黃水邊

又云有女人入水次浣濯為蛟所牽入石中經數日雷

擊石破見死蛟及女人屍浮出因號為破石

又曰浮石其石居汝水中心或水汎漲高岸皆沒此石居然不沒因以為名

又曰落峭石去飛猿館一百一十五里在飛猿水巍嵒嵌空數里可望即謝靈運詩云朝發悲猿嶠暮宿落峭石是其處也

始興記云營口東岸有石四方而高可百仞其狀若臺故名臺石竄然出焉其臺傍有石室前有石甕蓋以青

盤惡是銀製有人過者但得開觀而不可取之取之則悶絕封丘之奴竊二枚為大蛇所害即不知其自

永嘉記曰永嘉南岸有帆石乃堯時神人以破石推將入惡溪道置之溪側遙望有似張帆今俗號為張帆溪與天台山相接

郡國志曰東海信郎神破石為帆今東海有信郎祠即是

太平御覽卷五十二

欽定四庫全書

太平御覽卷五十三

宋 李昉等 撰

地部十八

丘

陵

阪

陁

峽

岡

丘

說文曰丘土之高非人所為丘字從一一地也一曰四方高中央下象形也

詩曰送子涉淇至於頓丘

又曰子之蕩兮宛丘之上兮

又曰楊園之道猗于畝丘

又曰綿蠻黃鳥止于丘隅

又曰丘中有麻彼留子嗟

禮曰太公封于營丘比及五世皆反葬於周君子曰樂

樂其所自生禮不忘其本古之人有言曰狐死正丘首
仁也

又曰公叔文子升於瑕丘蘧伯玉從

二子衛大夫

文子曰樂

哉斯丘也死則我欲葬馬蘧伯玉曰吾子欲之則瑗請前

刺其欲害人良田也
也瑗伯玉名也

又曰為高必因丘陵為下必因川澤

周禮曰丘陵其動物宜羽物其植物宜穀物其民專而
長

傳曰車脫其輹火焚其旗不利行師敗于崇丘

春秋元命苞曰堯為天子季秋中旬夢白帝遺以鳥喙
子其母為扶始昇高丘睹白帝上有雲虎之狀感已生

臯陶

春秋說題辭曰丘者墓也

又曰丘谷輔氣元士扶化

爾雅曰丘一成為敦丘

成猶重周禮曰為塗三成
今江東呼地之矩者為敦

再成

銳上為融丘三成為崑崙丘

崑崙山三重
形如累三孟

如乘者乘丘

形如車乘

如渚者渚丘

水中小洲為渚

水潦所止泥丘

頂上滲下

丘方胡

丘

形四方

絕高為之京

人力所作

非人為之曰丘

地自然生

水潦所

還曰將丘

將者謂丘邊有界將水繞環之

上正章丘

頂平

澤中有丘都丘

在水澤內

當塗梧丘

塗道

塗出其右而還之畫丘

言為道所規畫

塗出

其前載丘

道出丘南

塗出其後昌丘

道出丘北

水出其前消丘水

出其後沮丘水出其右正丘水出其左營丘

今齊之營丘溜水過

其南及東

如覆敦者敦丘邈迤沙丘左高咸丘右高臨丘前

高旄丘後高陵丘偏高阿丘丘背有丘為負丘

中央隆峻狀如

負一丘於背上

右澤定丘右陵秦丘

宋有秦丘見史記

如畝畝丘

丘有壑界

如陵陵丘丘上有丘為宛丘陳有宛丘

今在陳留郡

淮晉

有潛丘

今在太原晉陽縣

淮南有州黎丘

今在壽春

天下有名丘五

其三在河南二在河北

說者多以州黎宛營為河南者潛敦為河北者案北方稱天下

之名丘恐此諸丘碌碌未足用當之殆別有魁梧桀大者五但未詳其名號所在耳

廣雅曰小陵曰丘

又曰丘上有木為秘丘

家語曰丘陵為牡谿谷為牝

方言曰冢大者謂之丘

穆天子傳曰天子昇于崑崙之丘以觀黃帝之宮

郭璞注曰

黃帝巡狩四海登崑崙山起宮室於其上

又曰為盛姬曰哀淑之丘天子名之

為丘作名

是曰淑人之

丘乙丑天子東征舍乎五鹿叔姓

七和切

且哭

思盛姬也姓穆王女

也是曰女姓之丘

因以名五鹿也

丁卯天子東征釣于漯水以

祭淑人是曰祭丘東征山海曰崑崙之丘實惟帝之下

都

莊子曰衛靈公死卜葬於故墓不吉卜葬於沙丘而吉掘之數仞得石槨焉洗而視之有銘曰不憑其子靈公奪而埋之夫靈公之為靈久矣

淮南子曰堯時有大風為民害乃綴大風於青丘之野

許慎注曰大風大驚鳥也

文子曰川竭而谷虛丘夷而泉塞

越絕書曰闔閭冢在吳縣閭門外名曰虎丘下廣平六十步水深五丈銅槨三重玉鳧之流扁諸之劍在焉率

十萬人治之取土臨湖葬三日白虎居上故號曰虎丘
東方朔十洲記曰長洲一名青丘在南辰巳地地五千
里去岸二十五萬里上饒山川又多大樹樹有三千圍
者一洲之上專是林木故一名青丘仙草靈藥甘液玉
英靡所不有

齊地記曰營丘在臨淄小城內古以為齊室也丘下周
三百餘步高九丈北廂下隆丈五造井水深七丈餘井
與地平

伏韜北征記曰博望城內有成湯伊尹箕子冢今皆為丘

述異記曰南海中有軒轅丘鸞自歌鳳自舞古云天之樂也

郡國記曰濮陽縣本顓頊之城今謂之帝丘夏后之代昆吾君之春秋衛遷于帝丘夢人登昆吾之墟是也

又曰濮州初徙陶於乘故縣掘得漆杯二底內有朱文書曰乘丘既見風日靡然爛碎矣

陶今定陶

外國圖曰員丘之上有不死樹食之乃壽有赤泉飲之不老蕭丘多大風無人民羣犬居之青丘之民食穀衣野絲去瑯琊萬三千里神丘有火穴其光照千里去瑯琊三萬里

陳留風俗傳曰雍丘縣有陵五之丘以故名縣

酈道元注水經曰沮水西經楚昭王墓東對江陵城故王仲宣之賦登樓云西接昭丘是也

又曰鞏縣北有山臨河謂之岑原丘下有穴謂之鞏穴

言山潛通淮濟北達于河直穴有渚謂之鮪渚
十道志云岑原丘在縣西北三十三里

陵

釋名曰陵隆也體隆高也

易曰天險不可升也地險山川丘陵也

又曰升其高陵三歲不興

詩曰歟彼飛隼率彼中陵

又曰高岸為谷深谷為陵

禮曰五月可以居高明可以遠眺望可以升山陵

左傳蹇叔送其子曰殽有二陵其南陵夏后皋之墓其北陵文王之所避風雨也

春秋說題辭曰陵之為言稜也輔山成其廣稜層扶推益厥長也

孝經援神契曰德至山川丘陵則景雲出

宋均注曰景雲應周澤不

偏也

爾雅曰大阜曰陵

又曰東陵汛

所陳切

南陵息慎西陵威夷中陵朱滕北陵

西隄

鴈門之地是也

陵莫大於加陵梁莫大於漠梁墳莫大於

河墳謂之八陵

穆天子傳曰天子東遊次於崔梁曝蠹書于羽陵

莊子曰盜跖死於丘陵之上

又曰步仞之丘陵巨獸無所隱其軀而孽狐為之隆

呂氏春秋曰凡葬必於高陵之上以避狐狸之患水泉

之濕此則善矣

揚子法言曰百川學海而至於海丘陵學山而不至於

山是故惡夫住者

住者止也

魏子曰堯入百仞之谿則不照三里非朦闇位卑勢下故也桀紂昇百丈之陵能見四海非照明位高勢尊故也

十洲記曰崑崙崙陵即崑崙山也西海之成地北海之亥地去中國十萬里有弱水周匝繞山

吳錄曰張紘言於孫權曰秣陵楚武王所置名為金陵

秦始皇時望氣故掘斷連岡改名秣陵

物理論曰地者鎮之以五嶽積之以八陵

阪

詩曰阪有漆隰有栗

爾雅曰坡者曰阪

郭璞注曰阪地不平也

史記曰漢文帝常從霸陵西馳下峻坂袁盎攬轡上曰將軍怯也盎曰臣聞千金之子坐不垂堂百金之子立不倚衡今聖主乘危馳不測之淵如馬驚車敗奈高廟

何上乃止

漢書地理志曰河東蒲坂縣故曰蒲秦更名

應劭曰秦始皇東巡

見有長坂孟康曰本屬晉文公以賂秦秦人還蒲魏人喜曰蒲反矣

漢書曰王陽為益州至邛僰

蒲比切

坂九折歎曰奈何以

先人之遺體乘此險乎遂以病去及王遵為刺史至此

坂問吏曰此非王陽所畏道耶叱其馭驅之曰王陽為

孝子王遵為忠臣

應劭注曰坂在嚴道縣界

漢書西域傳曰西域有赤土身熱之坂上即令人身熱

無色頭痛嘔吐

續漢書地理志曰河東大陽縣有顛軫坂

蜀志曰先主至當陽長坂為曹公所追敗

王隱晉書曰孫登楊駿逼迎之與語不答賜布袍登借

刀截斷棄門下大呼曰刺斫卒病死後人見在貴馬坂

穆天子傳曰天子南還昇于長松之坂

郭璞注曰坂有長松

酈道元注水經曰洛水東經九曲其地千里有九坂之

曲穆天子傳所謂天子西征升九阿是也

又曰河水東經施門坂北今城臯西大坂是也昇涉此坂而東趣成臯城

列女後傳曰呂榮者吳郡許昇之妻也昇為賊所害榮貞固自守黃巾賊陳寶欲干穢之榮執節不聽寶遂殺榮是日疾風暴雨雷電晦冥寶恐懼叩頭謝葬之而去
糜府君聞榮高行遣主簿祭之又出錢助縣為冢於嘉興郭里墟北名曰義婦坂

華陽國志曰有牛叩頭坂馬搏頰坂其險如此

晉太康地記曰常山曲陽有恒山坂號飛狐口上壺關縣有羊腸坂

地理志曰函谷東坂謂之八特坂

述征記曰黃卷坂者傍絕澗以昇潼關長坂十餘里九坂皆迤邐長坂東京賦曰所謂西阻九阿者也

戴延之西京賦曰黃坂去終南六十里少華山西

任豫益州記曰汶江水源出玉輪坂下屬汶江郡在郡東北三十里

古今地略曰宜軫坂在鹽池東吳城之北今之吳坂
新序曰趙簡子上羊腸之坂羣臣皆推車宗會獨當戟
行歌簡子曰人臣而侮其主其罪若何會曰其罪死君
亦聞人君而侮其臣乎則智者不為謀辯者不為鬪則
其國危乎簡子曰善以宗會為上客

郡國志曰雍州咸陽縣北十五里長平坂漢武帝幸甘
泉馳道有蟲覆地赤如生肝問東方朔朔曰秦獄地冤
氣也臣聞酒能消愁以酒澆之果銷矣

陁

爾雅曰山絕曰陁

郭璞注曰連山中斷者也

漢書曰趙王成安君陳餘聞漢且襲之聚兵井陘口號

稱二十萬

穆天子傳曰天子北征乃絕漳水至于鉞山之下

郭璞注曰

井鉞山今在常山石邑鄉

述征記曰燕趙間凡厥山路名之曰陁井陘在常山

峽

水經注曰丹山在丹陽屬巴丹山西即巫山也有帝女
居焉宋玉所謂我帝之季女名曰瑤姬未行而亡封于
巫山之陽高唐之岨旦為雲暮為雨朝朝暮暮陽臺之
下朝暮視之果如其言故為立廟號朝雲焉其間首尾
一百六十里謂之巫峽蓋因山為名也

盛宏之荊州記曰舊云自二峽取蜀數千里中恒是一
山此蓋好大之言也唯三峽七百里中兩岸連山略無
闕處重巖疊嶂隱蔽天日自非亭午夜分不見日月至

於夏水襄陵沿沂沮絕或王命急宣有時可朝發白帝
暮至江陵其間一千二百里雖乘奔御風不為疾也春
夏之時則素湍淥潭迴清到影絕巘多生檜栢懸泉瀑
布出其間清縈峻茂良多雅趣每晴初霜旦林寒澗肅
常有高猿長嘯屬引淒異空岫傳響哀轉久絕故漁者
歌曰巴東三峽巫峽長猿鳴三聲淚沾裳

又曰南崖有重嶺疊起最大高崖間有石色如人負刀
牽牛人黑牛黃成就分明此崖既大加以江湍縈紆迴

塗經宿猶望見之行者歌曰朝發黃牛暮宿黃牛朝朝暮暮黃牛如故

庾仲雍荊州記曰巴陵楚之世有三峽明月峽廣德峽東突峽即今之巫峽梯歸峽歸鄉峽

袁山松宜都記曰自西陵沿江入峽口高山重嶂非日中半夜不見日月猿鳴至清諸山谷傳其響泠泠不絕也

王韶之始興記曰中宿縣有湏陽觀峽橫巒交枕絕崖

護水口有貞女峽峽西岸水際有石如人形高可七尺
狀似女子是曰貞女父老相傳秦世有女數人取螺於
此遇風雨晝昏而一女化為此石

鄧德明南康記曰雩都峽其水常自激通奔如轉輪

郡國志曰南鄉峽峽西八十里有巴鄉村善釀酒故俗
稱巴鄉酒也村傍有溪溪中多靈壽木焉

水經注曰湏陽觀峽下有廟世人以為河伯晉時縣人
有便至洛者使訖將還忽有一人寄其書云吾家在觀

前石間石間懸藤即其處也但扣藤自當有人取之使
者依其言果有二人出外取書并延入水府衣不沾濡
又曰續漢書云虞詡為武都太守下辯東三十餘里有
峽中舊生大石鄣塞水流春夏輒潰溢敗壞城郭詡
使人燒石以醋灌之石皆碎裂因鑄去焉遂無汎溺之
患

又曰涇水東南逕都廬山山路之中常有如彈箏之聲
行者鼓舞樂而後去即絃歌之山也故謂此峽為彈箏

峽

隴西記曰襄武有錦鏡峽即黑水所經其峽四望花木
明媚照影於其中因以稱之也

峽程記曰瀘合遂蜀四郡皆峽之郡自蠻江梧栢池導
諸江至此二百八十江會于峽前次荆門都四百五十
灘即有清水重峯胡灘漢灘忽雷閃電咤灘瀨灘狼尾
使君主簿皆使君主簿沉舟之所遂為名其他不悉記
之三峽者即明月峽仙山峽廣澤峽具有瞿塘灩澦燕

子屏風之類皆不預三峽之數

李膺益州記曰廣陽州東七里水南有遮要二堰石
東二里至明月峽峽前南岸壁高四十丈其壁有圓孔
形如滿月因以為名

岡

釋名曰岡亢也在上言之

詩曰陟彼高岡我馬玄黃

又曰如山如阜如岡如陵

又曰謂山蓋高為岡為陵

又曰陟彼岡兮瞻望兄兮

尚書曰火炎崑岡玉石俱焚

爾雅曰山脊曰岡

山謙之丹陽記曰句容縣東三十五里有龍岡岡頂有沸潭周迴十三丈聞人聲水便沸動不聞不涌也

王韶之始興記曰郡西南有芙蓉岡高若玉山隣枕郊郭周迴連亘四十餘里

又曰含淮縣白鹿城南有白鹿岡晉咸和中郡人張鮑作令著惠有白鹿遊岡因以為名

雷次宗豫章記曰洪井西有鸞岡舊說洪崖先生乘鸞所憩處也

顧微廣州記曰四會有金岡行人往往見金於岡側

裴淵廣州記曰城西北五里連續大岡直上百尋名為粵王冢吳朝掘覓尉佗墓竟無所見於天井岡得六玉璽一小車城北有馬鞏岡秦時瞻氣者言南方有天子

氣始皇發民鑿破此岡地中出血今鑿處猶在增城縣
有雲母岡日出照之晃曜

武昌記曰城北有岡高數丈名曰鳳闕其處顯敞昇闕
以望川澤多所遠瞻吳黃龍元年有鳳凰集此岡故謂
之鳳闕鳳闕南十里有金牛岡故老相傳云有金牛出
此岡岡今半崩坑深數丈金牛躍出踐岡邊遺跡猶存
王孚安成記曰萍鄉西津南五里山名女岡天氣將雨
水輒先湧出石門而有五色玄黃百姓謂之玉女披衣

鄧德明南康記曰陳蕃墓前青龍岡土人傳云昔見一物龍形而通身絕青數出岡頂及山邊以故名青龍也又曰贛縣馬脊岡在縣西形如馬脊故以為名也

任端體江陵記曰州城北五十四里有楚平王冢枝江有斑竹岡又云平王冢周圍數百步未知孰是

荊州記曰零陵郡東南有黃溪西有礬石岡

衡山記曰衡山有曾青岡出曾青可合仙藥有靈壽岡有靈壽木周迴數十里芝草岡有神芝靈草

郡國志曰久留岡者太守衛諷罷郡還京故老送別久留此岡

又曰顯朝岡在鬱平縣陸績制渾儀處

隋圖經曰歷陵縣西十里有石子岡寶山也而高大有冢如硯子世謂之硯子冢是趙簡子冢也石虎令人發之初得炭深一丈得連木板厚高八尺次得流泉水水色青冷非常以牛皮為囊作絞車以汲之一月而水無極乃止築城統之氣成樓闕

鄴道元水經註蓼水在襄國石井岡岡上有井大如輪
隋區宇圖經志云此井光武營軍所鑿傍有叢荆棘生
皆蟠縈如人手結云是光武繫馬處

又石勒時天旱沙門佛圖澄於此岡掘得一死龍長丈
餘濟以水良久乃蘇尋祭之龍騰空而上天雨即降因
名龍岡

鄴陽記曰大雷岡在縣東北後漢雷義字仲公所居又
有小雷岡雷煥所居



太平御覽卷五十三